

ՆՈՐ ՏԱՐՈՒԱՆ ՀՈԳՍԵՐԸ ՄՈՌԱՅՈՒԹԵԱՆ ԵՆ ՄԱՏՆՈՒՄ ՀԻՆ ՏԱՐԻՆԵՐԻ ՅԻՇՈՂՈՒԹԻՒՆՆԵՐԸ

Նոր տարուան շեմին, երբ հրաժեշտ ենք տալիս հին տարուն, սկսելու, կամ ավելի ճիշդ, շարունակելու մեզ նախատեսուած մէկ այլ օրերի ու ամիսների շարան, ամբողջացնելու մէկ այլ տարի, ներքին մի յուշ իւրաքանչիւրիս տանում է ետ, յատկապէս մանկութիւն, սպասումներով, թաքուն ձգտումներով լեցուած, արդէն վաղուց ապրուած երազային մի գեղեցիկ օր, որը Նոր տարի, Կաղանդ, Ամանոր, անունն էր կրում:

Թէեւ իւրաքանչիւրս իւրովի՝ աղքատ, համեստ, կամ շքեղ ենք դիմաւորել այն, բայց այդ օրը անհամբեր սպասումներով, երազանոց տօն է եղել բոլորիս համար:

Այսօր, երբ այնքան հասուն ենք, որ չենք խաբւում այլեւս ոչ Կաղանդ Պապաներու գոյութեամբ, ոչ փոքր կամ մեծ նուէրներով, զարմանալիօրէն կրկին մեր մէջ արթնանում է մեր մանկութեան հին կայծը, դարձնելով այդ օրը հաճելի, հարազատ, անյայտ խորհուրդներով ու դեռ նոր ձգտումներով լեցուած:

Իմ յիշողութեան մէջ մինչեւ օրս յստակ մնում է մի պատկեր՝ հայրս կաղանդի մեծ ծառ էր միշտ բերում, միշտ էլ ձիւնախառն փոթորիկին բռնուած, ահագին տարածութիւն քայլելով, քանի որ այդ փոթորիկին երթելեկը կանգ էր առնում այդ տարիներին: Երբ ինքն էլ ձեան մէջ թաթախուած ներս էր մտնում, մենք երեխաներով ուրախ ճիչով յարձակւում էինք ձեան մէջ կորած տօնածառը տեսնելու, մոռանալով հօրս, անտեղեակ թէ ինչ դժուարութեամբ էր հայրս այն տուն հասցրել: Մենք հաւատում էինք, որ Կաղանդ պապան կամ Ձմեռ պապն է այն նուիրել եւ

աշխարհը մեզ համար դառնում էր ինքնամոռաց տօն, անհոգ ուրախութիւն, երգ ու պար:

Յիմա չկայ հայրս, չկայ այլեւս այդ ինքնամոռաց ճիչն ու միամիտ, պարզ ուրախութիւնը մեր մէջ, չկայ Կաղանդ պապաների գոյութեան մանկական հաւատը: Կայ միայն հեռաւոր, այդ օրը ինձ համար իր լուսաշող խորհրդի մէջ պահող գեղեցիկ յուշը, որը փորձում եմ մաքուր պահել, չաղօտել առեւտրի յայտարարութիւններով գայթակղուած, նուէրների խելայեղ գնումներով լեցուած իրականութեան հետ, որը կապ չունի այլեւս իմ յիշողութեան մէջ դրոշմուած այդ սիրելի, պարզ ու միամիտ տօնի հետ:

Այսօր փոխուել է ամէն ինչ, փոխուել ենք մենք, մեր շրջապատով, մեր ընկալումներով, սովորոյթներով, մինչեւ իսկ Նոր տարին փոխել է իր իմաստը: Շատերի պէս, ինձ համար էլ այն ավելի մտածումների, քան անհոգ ուրախութիւնների օր է դարձել այլեւս եւ յատկապէս այս Նոր գալիք Տարին:

Զգիտեմ ինչո՞ւ տարեմուտի շեմին անցնող տարուան յայտարարի բերումով, ավելի տեսանելի, ավելի սուր է դրւում մեր ներդրումի, մեր գոյատեւման, մեր սերունդների, մեր բացթողումների հարցը: Վերլուծում-խորհրդրդածում ենք, քանզի իւրաքանչիւրս նոր սերունդ ունենք մեզ հետ հասակ նետող, գաւակներ, թոռներ, հայ պատանիներ ու երիտասարդներ մեր շրջապատում, մեր ժողովրդի իւրաքանչիւր հատուածում:

Ակամայ հարց ենք տալիս ինքներս մեզ, այս անցնող տարում ի՞նչ ենք յանձնում նրանց, ի՞նչ նոր վերելքներով հարստացրինք մեր պատմութիւնը, կապեցի՞նք նրանց մեր լեզուին, մեր պատմութեանը, ներգրաւեցի՞նք

Նրանց մեր ազգային շահերի պաշտպանության երթին: Չէ՞ որ ի վերջոյ բոլորիս ձգտումն է ազգային բարձր գիտակցութեամբ սերունդ գարգացնելը, երջանիկ Նոր տարիների իրական համամարդկային տօնախմբութիւն թողնելը նրանց:

Ահա թէ ինչու, ամանորեայ սովորոյթների, աւանդոյթների, յուշ դարձած, անցեալին անդրադառնալու փոխարէն, որոշեցի կանգ առնել ու ձեզ հետ մի պահ, խորհրդածել այն ամէնի մասին, որով մտահոգուած ենք, որով ապրում ենք, աւարտում հին տարին, որով թելակոխելու ենք մի նոր թուական, որը նոյնպէս յանձնելու ենք մեր սերունդներին:

Իսկ տարեմուտի այս օրերին այնքան հարցեր են լեռնացել մեր դէմ, այնքան նոր խնդիրներ ունենք լուծելու մեր սերունդներին անհոգ Նոր տարիների մուտք ապահովելու համար, որ անկարող ենք միայն անցեալի յիշատակներով յառաջանալ:

Յատկապէս այս օրերին, իրապէս երկաթեայ ջիղեր պիտի ունենալ, անտարբեր պարելու, մեր երկրում, մեր շուրջ՝ աշխարհում, կատարուող իրադրութիւնները անտեսելու, աչք փակելու, չտեսնել, չլսել ձեւացնելու համար: Բայց քանի որ հայ ենք, բնականաբար զրկուած ենք այդ կարողութիւնից:

Նախ՝ մեր ջիղերը վաղուց արդէն տրորւած, մաշուած են մեզ հետապնդող անվերջանալի հարուածներից: Եւ ամենակարեւորը՝ մի անհերքելի իրողութիւն է կախուած մեր գլխին, որ աշխարհի որ ծայրում էլ անհանգրստութիւն ծագի, կրկին հայն է ընդգրկուած լինում, հայ զանգուածին է հարուած հասնում, հայութիւնն է ծանր մտահոգութեան մատնւում:

Յագիւ հաւաքում, ոտքի ենք կանգնում, երբ մի նոր հարուած մասնատում է մեզ, մեր ուշադրութիւնն ու կարողութիւնը շեղում մեր հիմնական խնդրից՝ մեր երկրի կառուցումից, մեր սերունդների պահանջատիրութիւնը գործընթաց դարձնելու, իրապարակելու անհրաժեշտութիւնից: Միշտ սկսում ենք կէս թողած տեղից եւ մինչեւ կրկին ոտքի ենք կանգնում մի նոր հարուած է մեզ թուլացնում ու յետաձգում մեր առաջընթացը:

Վստահ եմ, պիտի մտածեք, որ ես կրկին ծանր հարցեր եմ շոշափում այս ուրախ առի-

թով, որ պետք է միայն մեր նուաճումների եւ վերելքների մասին խօսենք այսօր: Ես էլ բոլորիդ պէս եւ անելիով ձգտում եմ այդ օրուան: Բայց երբ մեր նուաճումները այնքան չնչին են եւ բացթողումներն ու անելիքները այնքան շատ, որ ստիպուած ենք վազելու անելիքների ետեւից, չհանգստանալով չարածով: Եւ ամենակարեւորը՝ Նոր տարին ամէնից առաջ նոր ծրագրերի ընդունման տարի է ուրեմն եւ պետք է խօսենք այդ անելիքների մասին:

Յաւանաբար, ինձ նման շատերդ էլ չէիք պատկերացնում, որ 2015 թուականին, որը շրջադարձային պիտի լինէր մեր ազգի ճակատագրում, շատերս այդպէս էինք սպասում, այսքան արագ է գալու: Այնքան արագ, որ մենք շուարած ու ձեռնուկայն ենք դիմաւորում այն: Որ մեր սերունդներին կրկին նոյն յոյսի ճանապարհով ենք առաջնորդում, որով մենք առաջնորդուեցինք: Որ անկախութիւն ձեռք բերած մեր հայրենիքում չունեցանք ողջ հայութեանը միաւորող, իր ժողովրդին ազնուօրէն ծառայող իշխանութիւն: Որ մեր հայրենիքի այժմեան երկու հատուածները՝ Յայաստանն ու Արցախը ոչ միայն չեն միաւորւած, անելին՝ դեռ տարածքների զիջման հարցն ու պատերազմի վտանգն է կախուած Արցախի գլխին:

Մեր անկախացած երկիրն է հայաթափում, Միջին Արեւելքի մեր ժողովրդի կեանքն ու գոյութիւնն է վտանգուած, որ դեռ մեր սերունդների իրաւունքի՝ մեր բռնագրաւած տարածքների, գոյքերի պահանջատիրութեան, մարդկային կորուստների փոխհատուցման հարցն է լռութեան մատնուած:

Այո՛, ծանր եւ որոշիչ տարի է մեր առջեւ ծառայած, որն անհոգ ուրախութեան իսկ պահին, պարտադրում է մեզ զգաստանալ ու այդ մասին մտածել: Արագ, իմաստուն, հեռատես քաղաքական գործելակերպ է պարտադրում այս գալիք տարին իւրաքանչիւր հային: Այն ստիպում է մեզ անցնող եւ անցած բոլոր տարիների մեր բացթողումները ծառայեցնել մեզ վերականգնելուն, աշխարհի որդեգրած քաղաքականութեանը հետ համընթաց քայլելով մեր երկիրը ամրապնդելուն:

Այսօր մեզ համար մեծ նուաճում է, որ մենք արդէն միայնակ ենք առերեսում Թուրքիոյ հետ, որպէս անկախ երկիր ու պետութիւն եւ

մենք այլևս իրաւունք չունենք աշխարհի ողորմածութեանը ապաւինելու, մեր երկրի եւ սերունդների ճակատագիրը նրանց զբաղմունքի, նրանց քաղաքական հաշիւների խայծ դարձնելու: Ամենամիամիտ մարդն էլ այս երկրագնդում, որը մի քիչ քաղաքական հոտառութիւն ունի, վստահ եմ գիտէ, որ աշխարհի ողորմածութեանը յոյսը դնել նշանակում է կործանուել:

Իսկ դրա համար ամենից առաջ ժամանակն է, որ փոխենք մեր կեցուածքը՝ աշխարհին այլևս ոչ թէ անվերջ, ամէն առիթով, որպէս միայն քրիստոնեայ ազգ ներկայանալու, այլ որպէս հայ ժողովուրդ: Ժողովուրդ, որը պահանջատեր է իր բռնագրաւուած երկրին, որը թէեւ թափառական, բայց կազմակերպւած է ապրում, հետեւողականօրէն պահում է իր ինքնութիւնն ու գոյութիւնը, իր մէջ ունի տարբեր դաւանանքի պատկանող հայութիւն եւ իր աշխատանքն է ներդնում իր ապրած իւրաքանչիւր երկրում:

Մենք՝ հայ ժողովուրդս, այսպէս ներկայանալով, այսպէս մտածելով ենք գործելու, քանի որ արդէն բացայայտ ոչ քրիստոնեայ տարր ունենք մեր մասը կազմող, տարբեր կրօնների պատկանող, որոնց 100 տարիներ աջքաթող ենք արել, որոնց թիւը գնալով շատանում է: Ինչպէ՞ս կարող ենք ինքներս մեզ միայն քրիստոնեայ ներկայացնել եւ արիամարիտ մեր ազգի միւս զաւակներին: Եւ չէ՞ որ միայն մենք չենք որպէս քրիստոնեայ ազգ կոտորուած ու կոտորուող: Նայեցէք այսօրւան անմարդկայնօրէն ոչնչացուող ափրիկեցի քրիստոնեաներին, հենց արաբ քրիստոնեաներին, քիւրտերին, եգիպտացիներին, յոյներին, թիւն ու երեւոյթը այնքան տարածուն է, որ այդ բոլորի մասին խօսելն ինքնին մի յօդուած է:

Բացի այդ աշխարհում հսկայ ու լուրջ քրիստոնեայ պետութիւններ կան, որոնք ամէն վայրկեան չեն մրճահարում իրենց քրիստոնեայ լինելը:

Որքան էլ թուով քիչ ենք, բայց պետութիւն ենք եւ ճանաչուած, ընդունուած երկիր, ունենք հարուստ ու հին անցեալ, մեր պատմութեամբ, մեր լեզուով մեր տարածքներով եւ մինչեւ անգամ մեր ներկայ աշխարհի հնագոյն մայրաքաղաքով:

Այսօր նոյնիսկ մեր թշնամին մեզ որպէս հակառակորդ երկիր ու պետութիւն է ընդունում, ամէն ինչ անում է ձերբազատուելու իր վզից կախուած մեր հարցից:

Ձեւացում է, իբր սարսափում է Յեղասպանութեան 100-ամեակից, մեզ զբաղեցնում է մտահոգ ձեւանալով մեր ամենէլիք քայլերից, եւ միեւնոյն ժամանակ քաջ գիտեցնալով, որ մենք ինչպէս միշտ տարուելու ենք աւելի շատ իր կեցուածքով, քան մեր պահանջը ներկայացնելով:

95-ամեակին թուրք-հայկական ծրագրի մէջբերումով մեզ զբաղեցնելով, նա ետ մղեց մեր պահանջատիրութեան գործընթացը, իսկ հիմա ազգովին սպասում ենք, թէ արդեօք մարդասպանը ընդունելու է արդէն մէկ անգամ հայ-թուրք յարաբերութեան մէջ տանուլ տուած մեր նախագահի հայաստանեան հրաւերը, թէ՞ ոչ:

Չենք մտահոգուած Մշին Արեւելքում իր կեանքի փրկութեան համար տառապող մեր հայրենակիցների, մեր երեխաների համար: Մի ամբողջ սերունդ է հասակ առնում վայրագ սպանութեան, աւերի եւ ռմբակոծումների մէջ, իսկ մենք շարունակում ենք մեր ճոխ, արդէն իր որակն ու չափը կորցրած խնճոյքների, հարսանիքների ու հրաւերների տեղատարափը ե՛լ արտերկրում, ե՛լ հայրենիքում:

Օտար երկրներն են ապաստանում մեր ժողովրդի փրկութիւն աղերսող հատուածին: Օտար երկրների ժողովուրդներ են սիրով հիւրընկալում նրանց:

Երեք ամիս առաջ սփիւռքի հարիւրաւոր ներկայացուցիչներ էին հաւաքուել հայրենի երկրում խորհրդակցութեան եւ թոււմ էր նրանց առաջնահերթ խնդիրը լինելու էր Սուրիոյ, Քեսապի, Իրաքի մեր հայութեան փրկութեան հարցը, հայրենիք ներգաղթելու նրանց իրաւունքը կառավարութեան առաջարկելը: Այսօր հազարաւոր հայեր են ճամբայ ընկել ոչ թէ հայրենիքից, այլ օտար պետութիւններից հրաւերք ստացած, նրանց երկրները գնալու, նրանց հարստացնելու եւ նրանց ձուլուելու, կորսուելու: Բայց չէ՞ որ մեր երկիրը ոչ միայն կարիք ունի մարդկային թուի, որն հրատապ անհրաժեշտութիւն է, այլ երկիրը պարտաւոր է տէր կանգնելու իր ցիր ու ցան եղող ազգին: Ժամանակին կուսակ-

ցութիւնները, կազմակերպութիւնները, տարբեր ազգային հաստատութիւններ էին հսկում, ճիգ գործադրում, որ հայութիւնը կենտրոնականայ նոյնիսկ երագուած հայրենիքում, որ նոր օտար օճախներ չստեղծուեն աշխարհի այլ վայրերում: Միթէ՞ այս վիճակն ենք յանձնելու սերունդներին:

Ինչո՞ւ 100 տարուան մեր նուաճումներում չկարողացանք հայրենիքը միասնական դարձնել: Ինչո՞ւ արցախցին պատերազմի վտանգին դիմագրաւում է իր հողը պաշտպանելու հաստատ հաւատով եւ մեր հոգին հարստացնում իր գործած սխրանքներով, իսկ օտար երկրում պատերազմից իր կեանքը փրկող մեր ժողովուրդը չի ուզում հայրենի երկրում տեղաւորուել, նրա առօրեայ դժուարութիւնները կիսել: Ուզում է իր գաւակներին օտարութեան մէջ, լաւագոյն դէպքում, կէս հայ մեծացնել, բայց չի ուզում նրանց իրապէս կապել իրենց հողին: Ինչո՞ւ: Սրանք հարցեր են, որոնց լրջօրէն չենք անդրադառնում:

Մեր ժողովուրդը սովորոյթներով ապրող է, նա սովոր է, որ իրեն առաջնորդեն, գոնէ վերջին հազարամեակում այդ դերը վերցրել էին կուսակցութիւնները: Դրա արդիւնքում ունեցանք կազմակերպուած համայնքներ ու միակամ՝ անկախ հայրենիք ձգտող ժողովուրդ: Իսկ հիմա նա յայտնուել է պարապուտում: Նրան առաջնորդող համապատասխան մարմինները չկան: Ամէն ինչ մանրացրել, դարձրել ենք աթոռ ու իշխանութիւն, մանր քաշքշուկների պայքար, եւ դեռ ուզում ենք աճող սերունդին պահել մեր կողքին, պահել մեր

մէջ: Միթէ՞ չենք տեսնում, որ գնալով նօսրանում է այդ շարքը, գնալով պակասում է հայ լեզուի ու մշակոյթի կապուածութիւնը, լուծուում, փոշիանում է արեւմտահայ լեզուն ու ինքնութիւնը, դրա հետ մէկտեղ արեւմտահայի հոգեբանութիւնն ու ձգտումը, իր կորցրած երկրի, իր բռնագրաւած ու ոտնահարուած իրաւունքների պահանջը:

Յաջորդ տարի մուտք ենք գործում մի այնպիսի թուական, որը մեր պատմութեան ամէնէն արիւնոտ էջի՝ 100 տարիների ամփոփումն է: Ուրեմն մեզնից է կախուած թէ ինչպէ՞ս ենք իրագործելու մեր զոհերի մեզ կտակած պահանջը՝ արդար հատուցման, նրանցից իւրաքանչիւրից խլուած մարդկային ու ազգային իրաւունքի պահանջը: Մեզնից է կախուած լուծելու հիմնական մի հարց՝ մենք շարունակելո՞ւ ենք մեր սերունդների ուսերին նետել նոյն կտակը, թէ՞ տեր կանգնելով մեզ յանձնուածին, իրագործելու ենք ազգային մեզ վստահուած պահանջը:

Քանի դեռ չենք իրագործել այդ կտակը, իրաւունք չունենք անհոգ նոր տարիներ մուտք գործել: Իւրաքանչիւր Նոր տարի, նոր մղումների, ազգային պահանջատիրութեան մի նոր քայլի դուռ է մեզ համար: Օգտագործենք այդ նախամուտքը եւ նոր տարին սկսենք, մենք՝ հայ ժողովուրդս նշանաբանով:

ԴՈՎՏ. ՄԱՐԻ ՌՈՉ ԱՐՈՒՄԷՖԵԱՆ

Սան Ֆրանսիսքո